

OTVOREN CENTAR ZA RANO PODSTICANJE RAZVOJA I RANU INTERVENCIJU ZA DJECU S POSEBNIM POTREBAMA U ZENICI

Protekli četvrtak, 24. septembra, ministar za rad, socijalnu politiku i izbjeglice Zeničko-dobojskog kantona Josip Martić i načelnik općine Zenica Husejin Smajlović su u prisustvu ambasadora SR Njemačke u BiH Joachima Schmidta otvorili Centar za rano podsticanje razvoja i ranu intervenciju za djecu s posebnim potrebama u Zenici. Svečanosti otvorenja su pored predstavnika kan-

tonalnih i lokalnih vlasti, prisustvovati i predstavnici njemačkih partnera na projektu, centara za socijalni rad, domova zdravlja, udruženja za pomoć osobama sa posebnim potrebama, vrtića te brojni drugi gosti.

Partnerski projekt

Centar se počeo graditi prije nepunih deset mjeseci, zahvaljujući sredstvima Ministarstva za razvoj i ekonomsku saradnju SR Njemačke

(810.000 KM), zatim Ministarstva za rad, socijalnu politiku i izbjeglice ZDK (120.000 KM), Općine Zenica (330.000 KM) te organizacije „Bild hilft e.V. - Ein Herz für Kinder“ iz Njemačke (oko 40.000 KM). „Projekt je implementiran kroz saradnju Udruženja Humanost - societas humanitatis iz Zenice, nosioca projektnih aktivnosti, i humanitarnih organizacija, Terra Tech i Lebenshilfe Plauen gGmbH iz

Projekt vrijedan 1.300.000 KM

SR Njemačke kao administrativno - tehničkog i stručnog partnera”, kazala je Dženana Čerimić, menadžerica projekta, zahvaljujući se ujedno svima na angažmanu u realizaciji ovog projekta.

Rad reguliran ugovorom

Po riječima resornog kantonalnog ministra Josipa Martića, radi se o prvom centru ovakve vrste u BiH ali i regionu. Nakon svečanog otvaranja Centra predstavnici ZDK i svih 12 općina ovog kantona, zajedno s predstavnikom Udruženja „Humanost”, potpisali su ugovor kojim će biti reguliran rad Centra u prve dvije godine pilot-faze, od 1. oktobra 2009. do 30. septembra 2011. godine. Osim općina i ZDK, rad Centra finansijski će podržati i inozemni donatori. I.H.H.



Stotinu potencijalnih korisnika

Centar je namijenjen djeci ometenoj u razvoju ili u riziku od nastajanja ometenosti u razvoju, koja su u svom tjelesnom, kognitivnom, govornom, emocionalnom i socijalnom razvoju ugrožena ili usporena, od rođenja do polaska u školu, kao i njihovim roditeljima, drugim zakonskim starateljima i osobama koje vrše odgojnu funkciju sa područja općina ZE-DO kantona. Potrebu za postojanjem jednog ovakvog centra, jedinstvenog za područje BiH, su potvrdila i istraživanja na terenu. Uposlenici Udruženja Humanost su, naime, u proteklom periodu uspjeli posjetiti blizu stotinu porodica djece sa posebnim potrebama s područja ZE-DO kantona, koji su evidentirani kao potencijalni budući korisnici ambulansnih i mobilnih usluga Centra.

Sanela Sarajlić je majka dvoje blizanaca, dječaka, koji će u budućnosti koristiti usluge Centra: Evo šta o tome kaže:

- Dječaci imaju usporen psiho-motorni razvoj, miješano sa autizmom. Kasno su prohodali, ali su hvala Bogu prohodali nakon fizikalnih terapija. Sad treba raditi na njihovom govoru, osamostaljavati ih da se sami hrane, oblače... Nadam se da će stručni tim uraditi za njih koliko može, da bi oni mogli iole samostalno sutra učestvovati u životu, da se osposobe za ono najbitnije. Nadam se i većem uspjehu. Otvaranje Centra meni jako puno znači jer ja kao roditelj mogu njih puno voljeti, njegovati, ali ne mogu postići ono što može stručni tim.

